

आकाशवाणी

पैहले खास-खास खबरां:-

1. प्रधानमंत्री नरेन्द्र मोदी ते फिनलैंड दे राष्ट्रपति अलेक्जेंडर स्टब हुंदे बशकार अज्ज नमीं दिल्ली च दपक्खी गल्लबात होग। दवै नेता बक्ख-बक्ख क्षेत्रे च आपसी सहयोग बधाने दे कन्नो-कन्नी क्षेत्री ते कुल संसारी मुद्दे पर विचार-बटांदरा करगंन।
2. 10 राज्ये दिये 37 राज्यसभा सीटें लेई नामांकन दाखल करने दी अज्ज खीरी तरीक- मतदान 16 मार्च गी होग।
3. नेपाल च नमीं संसद लेई मतदान अज्ज होआ करदा ऐ। 3 करोड़ अबादी आहले नेपाल च इक करोड़ 90 लक्ख योग्य मतदाता न।
4. रायसीना डॉयलाग 2026 अज्ज संजा नमीं दिल्ली च शुरु होआ"रदा ऐ-केई मुल्के दे नेता एहदे च हिस्सा लैने भारत आए देन।
5. अमरीकी संसद नै राष्ट्रपति डोनाल्ड ट्रम्प हुंदी ईरान खलाफ फौजी कार्रवाई दा समर्थन करदे होई- लड़ाई रोकने लेई द्विपार्टी प्रस्ताव खलाफ वोट कीता ऐ।
6. आई.सी.सी. टी-20 विश्व कप दा दुआ सैमीफाईनल अज्ज मुम्बई च भारत ते इंग्लैंड बशकार खेडढेया जाहग। कल कोलकाता च पैहले सैमीफाईनल च न्यूजीलैंड नै दक्खन अफ्रीका गा 9 विकेटे कन्नै रहाइयै फाईनल च प्रवेश कीता।

PM -Finland Prez

प्रधानमंत्री नरेन्द्र मोदी ते फिनलैंड दे राष्ट्रपति अलेक्जेंडर स्टब हुंदे बश्कार अज्ज नमीं दिल्ली च दपक्खी बैठक होग। दवै नेता आपसी साथ-सहयोग गी बक्ख-बक्ख क्षेत्रें च होर निग्गर बनाने सने- क्षेत्रीय ते कुलसंसारी मुद्दें पर विचार-बटांदरा करगंन। गल्लबात दे बाद केई समझौतें पर दस्तख्त होने दी बी मेद ऐ। प्रधानमंत्री मोदी- राष्ट्रपति स्टब हुंदे सम्मान च अज्ज दपैहरी इक धाम दा सरिस्ता करा करदे न। अलेक्जेंडर स्टब होर 4 दिनें दी सरकारी यात्रा पर कल नमीं दिल्ली पुज्जे हे। ब्हाई अड्डे पुज्जने पर विदेश राज्यमंत्री कीर्ति वर्धन सिंह होरें उन्दी अगुवानी कीती ही। रस्मी सुआगत दे बाद उ'नेंगी गार्ड ऑफ ऑनर बी दिता गया।

<><><><><><>

Fin Prez -Meetings

4 दिन दे भारत दौरें पर आए दे फिनलैंड दे राष्ट्रपति हुंदा भारत दा एह पैहला-पैहला दौरा ऐ। अज्ज उ'दा राष्ट्रपति भवन च राष्ट्रपति द्रौपदी मुरमू हुंदे नै बी मिलने दा कार्यक्रम ऐ। दौरें दौरान उपराष्ट्रपति सी.पी. राधाकृष्णन ते विदेश मंत्री डाक्टर एस. राधाकृष्णन हुंदे नै बी उन्दी मलाटी तैह ऐ। ओ राजधानी दिल्ली च अज्ज संजा लग्गने आहले 11में रायसीना डॉयलाग-2026 च मुख्क भाषण बी देगंन। भारत ते फिनलैंड दे लोकतांत्रिक मुल्लें पर आधारित बड़े निग्गर- निग्गे ते दोस्ताना तालुकात न। फिनलैंड यूरोपीय संघ ते नार्डिक क्षेत्र च भारत दा इक प्रमुख्क प्राथमिकता आहले मितर मुख्क ऐ।



शुरु होने जा'रदा ऐ। 3 रोजा इस सम्मेलन च दुनिया भरै थमां लीडर- नीति निर्माता- बक्ख-बक्ख क्षेत्रें दे माहिर- अंतराश्ट्रीय मुद्दें ते रणनीति सहयोग पर विचार-बटांदरा करगंन। “रायसीना संवाद 2026” दा विषय ऐ- संस्कारें दा अनुसरण- उनेंगी शामिल करना ते अगड़े बधना- मजूदा दुनिया दे परिदृश्य गी दर्शादा ऐ। एहदा सरिस्ता विदेश मंत्रालय दे सहयोग कन्नै Observer Research Foundation आसेया कीता जा'रदा ऐ। 2016 च स्थापित एह सलाना संवाद अंतराश्ट्रीय मामले पर चर्चा करने लेई भारत दा इक प्रमुख मंच बनियै उभरेया ऐ। सम्मेलन च केई विदेशी हस्तियां बी हिस्सा लैने औंदियां न ते ऐकती भूटान दे विदेशमंत्री ल्योपो दीना नाथ धुंग्येल- फिनलैंड दे राष्ट्रपति अलेक्जेंडर स्टब- अमरीका दे उपविदेश मंत्री क्रिस्टोफर लैंडौ- सेशैल्स दे विदेशमंत्री बैरी फॉरे- मारीशस दे अंतराश्ट्रीय बपार मंत्री धनजंय रामफुल ते श्रीलंका दे पर्यटन मंत्री विजिथा हेरथ शामिल न।

<><><><><><>

US Senate

अमरीकी सीनेट नै राष्ट्रपति डोनाल्ड ट्रम्प हुंदे ईरान खिलाफ सैन्य अभियान दा समर्थक कीता ऐ। सीनेटरें सैन्य कार्रवाई रोकने दे मकसद कन्नै लाए गेदे द्विदलीय प्रस्ताव गी अग्गे बदने थवां रोकने दे पक्ख च मतदान कीता। सीनेट नै 53 दे मुकाबले 47 मते थवां प्रस्ताव गी अग्गे नैई बदाने दा फैसला कीता- जेड़ा मुख तौरा पर पार्टी लाईन दे मुजब हा। मध्य पूर्व च ट्रम्प आसेआ सैन्य सम्पतियें दे विस्तार ते ईरान च अमरीकी ते इजरायली हमले गी लेइयै बहस

इस गल्ला पर केन्द्रित रेई जे केहू ट्रम्प मुख गी इराक ते अफगानिस्तान दे लम्मे संघर्ष जनेह इक होर अंतहीन युद्ध च धकेला'रदे न।

<><><><><><>

EAM

विदेश मंत्रालय नै पच्छिम एशिया ते खाड़ी क्षेत्र दी मौजूदा स्थिति गी ध्यान च रक्खदे होई नियंत्रण कक्ष कायम कीता ऐ। बड्डलै 9 बजे थमां रातीं 9 बजे तगर टेलीफोन राएं इस नियंत्रण कक्ष कन्नै सम्पर्क कीता जाई सकदा ऐ। नम्बर न- 1800118797-011-2301-2113-011-2301 4104 ते 011-2301 7905

<><><><><><>

Air India Advisory

एयर अंडिया नै पच्छिम एशिया च मजूदा हालात दे चलदे मती मंग गी दिक्खदे होई टोरंटो-फ्रैंक फर्ट ते पेरिस चार्ल्स डी गाल लेई बादू छमता आहलियां ब्हाई डोआरियां चलाने दी घोषणा कीती ऐ। सोशल मीडिया पोस्ट च एयर इंडिया नै दस्सेआ ऐ जे अज्जै थमां 11 मार्च तगर दिल्ली ते टोरन्टो बश्कार 3 बादू डोआरियां- 7 कोला 10 मार्च मझाटै दिल्ली ते फ्रैंकफ्रंट बश्कार 3 ते दिल्ली ते पेरिस बश्कार इक बादू डोआरी चलाई जाहग।

<><><><><><>

JK CM –Civil Society

जम्मू-कश्मीर दे मुखमंत्री उमर अब्दुल्ला होंरें अमरीका- इजराईल दे ब्हाई हमले च ईरान दे सुप्रीम लीडर अयातुल्लाह अली खामनेई हुंदे मारे जाने दी पच्छोकड़े च पच्छम एशिया च बने दे हालात पर चर्चा लेई कल धार्मिक लीडरें ते सिविल समाज दे सदस्यें कन्नै मलाटी कीती। मुखमंत्री हुंदे दफतरें- सोशल मीडिया मंच “एक्स” पर कीती गेदी इक पोस्ट च दस्सेया जे श्रीनगर च लाई गेदी इस बैठक दरान धार्मिक लीडरें ते सिविल समाज दे सदस्यें- ईरान च मनुखी जिंदगियें दे नुकसान उप्पर चैंता बुज्जदे होई इनें घटनाएं पर बसोस जताया। बैठक दरान मुखमंत्री होंरें जम्मू-कश्मीर च रमानदारी ते सदभाव बनाई रक्खने दे महत्वै पर चेचा जोर दिता।

<><><><><><>

T-20 World Cup

आई.सी.सी. टी-20 विश्व कप दे दुए सैमीफाईनल च अज्ज भारत ते इंग्लैंड बश्कार मकाबला होग। एह मैच मुम्बई दे वानखेड़े स्टेडियम च संजा 7 बजे शुरु होग। कल संजा चैम्पियनशीप दे पैहले सैमीफाईल च न्यूजीलैंड नै दक्ख अफ्रीका गी 9 विकटें कन्नै रहाई दिता। पैहले बल्लेबाजी करदे होई दक्खन अफ्रीका ना 20एं ओवरें च 8 विकटें दे नुकसान पर 169 रन्ज बनाए। परते च फिन ऐलन दी नाबाद सैन्यरी दी बदौलत न्यूजीलैंड नै 170 रन्ज दा लक्ष 12 ओवर ते 5 गेदें च गै करी लैता। न्यूजीलैंड दी तरफा टिम सीफर्ट नै 33 गेदें पर 58 रन्ज बनाए ते उसी “मैन ऑफ द मैच” घोषत कीता गया। इस जित दे कन्नै गै

न्यूजीलैंड फाइनल च पुज्जी गया ते अज्ज दुए सैमीफाईनल दे जेत् कन्नै ओहदा मकाबला 8 मार्च गी गुजरात दे नरेन्द्र मोदी स्टेडियम च खेडेया जाहग।

<><><><><><>

Badminton

All England Badminton Championship 2026 दे दुए ध्याड़े भारत दे सात्विक साईराज रंकी रेड्डी- चिराग शेट्टी- रोहन कपूर- रुत्विका गड्डे ते आयूष शेट्टी त्रवै पैहले दौर च हारियै टूर्नामेंट चा बाहर होई गेन। मर्दे दे डबल्स मकाबले च दुनिया दे 4थें नम्बरै पर रंकी रेड्डी ते शेट्टी गी मलेशिया दे कांग खाई शिंग ते आरोन ताई खलाफ 21-22, 12-21 कन्नै हार दा सामना करना पेया- जिसलै जे मिक्स्ट डबल्स च रोहन कपूर ते रुत्विका गड्डे दी जोड़ी फ्रांस दी थॉम गिक्वेल ते डेल्फिन डेलरु दी जोड़ी कोला 12-21, 15-21 कन्नै हारी गेई- जिसलै जे इक होर मकाबले च आयुश शेट्टी गी अल्वी फरहान खलाफ 21-19, जी-21, 17-21 कन्नै हार दा सामना करना पेया।

<><><><><><>